



«Հաստատում եմ»
ԵՊՀ պրոռեկտոր
Է. Վ. ԱՍՐԻՅԱՆ
18.02.2020

ԿԱՐԾԻՔ

Լուսինե Ասատուրի Տանաջյանի

**«Սոցիալական փոփոխությունները հայկական սփյուռքում
(Լոս Անջելեսի, Թեհրանի, Բեյրութի հայերի էթնոսոցիոլոգիական հետազոտություն)»
թեմայով Է.00.04 «Ազգագրություն» մասնագիտությամբ պատմական գիտությունների
թեկնածուի գիտական աստիճանի հայցման ատենախոսության մասին**

Հաստատված է ԵՊՀ սփյուռքագիտության ամբիոնի 2020 թ. փետրվարի 13-ի նիստում (արձանագրություն թիվ 5): Նիստին մասնակցում էին Ա. Եղիազարյանը, Հ. Մարտիրոսյանը, Ա. Հովհաննիսյանը, Է. Հովհաննիսյանը, Տ. Մինասյանը, Գ. Մխիթարյանը:

Արդի հայկական սփյուռքի առանձին համայնքների էթնոսոցիոլոգիական հետազոտությունները ներկայումս հույժ կարևոր ու պահանջված են՝ դրանք խորությամբ ճանաչելու, եղած խնդիրները բացահայտելու, սփյուռքահայ հատվածի սոցիալական կառույցը, գործընթացներն ու երևույթները հստակեցնելու և այլ առումներով: Նշվածի համատեքստում կարևորվում է Լուսինե Ասատուրի Տանաջյանի «Սոցիալական փոփոխությունները հայկական սփյուռքում (Լոս Անջելեսի, Թեհրանի, Բեյրութի հայերի էթնոսոցիոլոգիական հետազոտություն)» թեմայով Է.00.04 «Ազգագրություն» մասնագիտությամբ պատմական գիտությունների թեկնածուի գիտական աստիճանի հայցման ատենախոսությունը: Հեղինակը Բեյրութի, Թեհրանի, Լոս Անջելեսի հայկական համայնքների վերլուծության հիման վրա ներկայացրել է սոցիալական տեղաշարժերի հիմնական միտումները սփյուռքի տարբեր հատվածներում:

Ատենախոսությունը գրվել է հայերեն և օտարալեզու տարաբնույթ սկզբնաղբյուրների և մասնագիտական գրականության, ինչպես նաև դաշտային հետազոտությունների և համացանցային նյութերի հիման վրա՝ վերլուծական, պատմահամեմատական և պատմանկարագրական մեթոդաբանությամբ:

Ատենախոսությունը բաղկացած է ներածությունից, երեք գլուխներից, եզրակացությունից, օգտագործված սկզբնաղբյուրների և գրականության ցանկից, հավելվածից:

Ներածությունում ներկայացված են թեմայի կարևորությունն ու արդիականությունը, գիտական նորույթը, աշխատանքի նպատակներն ու խնդիրները, գրականության համառոտ տեսությունը, մեթոդաբանական հիմքը:

Ատենախոսության առաջին գլխում ընդհանրական ձևով ներկայացված է սոցիալական փոփոխությունների էությունը էթնիկության համատեքստում: Երկրորդ գլխում խոսվում է հայկական սփյուռքում առկա սոցիալական գործընթացների առանձնահատկությունների մասին: Երրորդ գլուխը նվիրված է արդեն Բեյրութի, Թեհրանի, Լոս Անջելեսի հայկական համայնքների համեմատական վերլուծությանը: Եզրակացության մեջ համակարգված ձևով ամփոփված են աշխատանքի հիմնական արդյունքները:

Ինչպես և յուրաքանչյուր ուսումնասիրություն, Լ. Տանաջյանի ատենախոսությունն էլ գերծ չի մնացել որոշակի թերություններից, որոնց վերաբերյալ ներկայացնում ենք որոշ դիտարկումներ:

1. Չնայած իր բավականին կուռ կառուցվածքին՝ ատենախոսության ներածությունը թերևս կարելի էր ներկայացնել առավել համակարգված ձևով՝ առանձնացնելով արդիականության, գիտական կարևորության, նպատակների, խնդիրների, մեթոդաբանության և այլ բաժինները, որը, ի դեպ, կատարված է ատենախոսության սեղմագրում:

2. Օգտագործված օտարալեզու բառերը (օրինակ՝ օպերացիոնալիստական, պրեստիժային և այլն) կարելի էր առաջին անգամ օտարահունչ տեսքով կիրառելուց և բացատրելուց հետո այնուհետև ներկայացնել արդեն հայերեն համարժեքներով:

3. Ներկայացված գրականության ցանկը կարելի էր համակարգել ընդունված ձևով՝ ըստ սկզբնաղբյուրների, մամուլի, մենագրությունների և գիտական հոդվածների առանձնացված բաժինների:

Սակայն ներկայացված դիտողությունները, որոնք Լ. Տանաջյանի աշխատանքին արդեն հրատարակության ներկայացնելիս առավել համակարգված տեսք հաղորդելու ցանկության արդյունք են, չպետք է որևէ ազդեցություն ունենան ատենախոսության դրական գնահատականի վրա: Ատենախոսը հաջող կերպով կատարել է իր առջև դրված խնդիրը՝ վեր հանելով և վերլուծելով թեմային վերաբերվող հանգուցային հարցերը: Ատենախոսության տեքստն ընդհանուր առմամբ գրագետ է: Աշխատանքն ունի գիտական, գործնական-կիրառական նշանակություն:

Որոշեցին – ԵՊՀ սփյուռքագիտության ամբիոնը, ելնելով վերոհիշյալից, գտնում է.

Ատենախոսությունը, իր հիմքում դրված դաշտային հետազոտությունների արդյունքներով և բազմալեզու գրականությամբ, իրենից ներկայացնում է գիտական և կիրառական առումով կարևոր և արդիական աշխատություն:

Լուսինե Ասատուրի Տանաջյանի «Սոցիալական փոփոխությունները հայկական սփյուռքում (Լոս Անջելեսի, Թեհրանի, Բեյրութի հայերի էթնոսոցիոլոգիական հետազոտություն)» թեմայով Է.00.04 «Ազգագրություն» մասնագիտությամբ պատմական գիտությունների թեկնածուի գիտական աստիճանի հայցման ատենախոսությունը

բավարարում է ՀՀ ԲՈԿ-ի կողմից թեկնածուական ատենախոսություններին ներկայացվող պահանջներին, իսկ հեղինակը՝ Լուսինե Ասատուրի Տանաջյանը, արժանի է իր հայցած պատմական գիտությունների թեկնածուի գիտական աստիճանին:

ՍՓՅՈՒՌՔԱԳԻՏՈՒԹՅԱՆ ԱՄԲԻՈՆԻ ՎԱՐԻՉ,
Պ.Գ.Դ., ԴՈՑԵՆՏ՝

Ա. Ս. ԵՂԻԱԶԱՐՅԱՆ

Պ.գ.դ., դոցենտ Ա. Ս. Եղիազարյանի ստորագրությունը հաստատում եմ՝



ԵՊՀ ԳԻՏԱԿԱՆ ՔԱՐՏՈՒՂԱՐ՝

Լ. Ս. ՀՈՎՍԵՓՅԱՆ

18.02.2020 թ.